

communicabit. Simulac vero ego semina ab illo promissa obtinuero, prima occasione cum reliquis vndique a me collectis, et cum insectorum mihi incognitorum speciminibus ad TE mittam. Possideo quidem insecta noua haud multa, attamen quaedam eorum admodum distincta et spero pauca haec a discipulo missa accepta fore. Kuhnium nostrum in Anglia haud vidi, percucurrit Belgium Galliamque et ante sex hebdomades reueniens patrios petiit lares. Detegere plura noua sane valet, nisi nimia praxis medica historiae naturalis ardorem exstinguet.

In itinere meo per Angliam paucas reperi plantas, nisi aliquot lichenes, quos distinctos nouosque credo. Composui vero paruam collectionem sane singularem a vegetabilibus, quae in fodinis lithanthracum altissimis inueni. Sunt, vti credo, a nemine descripta et vnum alterumue genus proprium efficiunt. Descriptionem simul cum speciminibus de omnibus a me repertis principi Botanicorum immortalis communicabo, quando semina insectaque mittam.

Oxfordiae conseruatur herbarium Sherardi et Dillenii, si forte vnam alteramue plantam nondum satis notam ibi credis, eam forte procurare valerem, quum ibi liberior patet aditus.

D. Ellisium hodie haud reperi, attamen a plurimis audiui, Theam nunquam in America Boreali plantatam fuisse. Nouellae Anglicae saepius mentiri solent. Duas nunc proponis Theae species, an aliam quam Hillii auctoritatem habes? Ne nimis illi credas velim, quum saepissime mentiri dicitur.

Caisae nostrae saltatricis vices sane doluissem, si puerperio mortua fuisset. Spero adhuc redux in Suecia, si fata permittunt, vnum alterumue Polonicum cum illa extricare. Recordor adhuc beatissimis illis diebus Vpsaliae et Hammarby consumtis, et forte adhuc reuertent.

Vale meque fauere perge. Vt nobilissimam TVAM familiam meis verbis humillime salutes oro rogoque.

Londini d. XV Dec.

1767.

by Mr. Largeaus Devereux Court Temple Bar.